

Ngā Pātai Auau

He aha te Whakatewhatewhatanga Motuhake o Dilworth?

Kua whakatūria te Whakatewhatewhatanga Motuhake o Dilworth hei arotake, hei tūhura hoki i ngā tūkinotanga i puta i te Kura o Dilworth me ngā āhuatanga i puta ai. Mō ētahi whakamāramatanga atu anō, tēnā, pānuitia ngā Tikanga Whakahaere a te Whakatewhatewhatanga ki tō mātou pae tukutuku www.dilworthinquiry.org.nz

E noho motuhake ana mātou i Te Kura o Dilworth, te Poari Kaitiaki o Dilworth me te Kāwanatanga. He mea ārahi mātou e Ngā Tikanga Whakahaere i whakakōpanihia nei e te Heamana me te Kaiwhakatewhatewha Takirua o te Whakatewhatewhatanga i muri i tētahi hātepe whakahoki whakaaro i whai wāhi ai ngā tūora Tama o Mua o Dilworth, ngā mema whānau me te hāpori whānui tonu o Dilworth.

Mā tētahi kaitiaki herekore te wāhi ki ngā ratonga whakahaere me te whakarite kia pai ai tā te Whakatewhatewhatanga karawhiu i tōna mana whakahaere kia pai, ā, kia motuhake anō hoki i Te Poari Kaitiaki o Dilworth. Ā tōna wā whakaingoatia ai taua kaitiaki. He aha te aronga o te

Whakatewhatewhatanga?

Ko te aronga o te Whakatewhatewhatanga he mātai, he tūhura anō hoki i:

- te āhua me te rangiwhāwhātanga o ngā pāwheratanga me ētahi atu tūkinotanga ki Te Kura o Dilworth.
- ngā āhuatanga i hua ake ai, i tutungi rānei i ngā tūkinotanga;
- ngā mahi me ngā hapa o te Kura, o ōna kaitiaki, o ōna āpiha me ōna kaimahi i tā rātou tuku urupare, kōrero rānei mō ngā amuamu tūkinotanga;
- te rawaka o ngā kaupapa here me ngā hātepe i te Kura ā mohoa nei hei ārai i ngā tūkinotanga o te anamata.

Kia mōhio mai, kāore e taea e mātou te whakatau ngā kawenga ā-ture o tētahi tangata, hinonga rānei mō ngā tūkinotanga, mahi, hapa rānei..

Mēnā koe kei te pīrangi tuku amuamu ki ngā Pirihimana e pā ana ki te tūkinotanga o tētahi tauira, o ētahi tauira rānei ki Te Kura o Dilworth, tēnā, whakapā atu ki ngā Pirihimana mā operation.Beverly@police.govt.nz, mā [\(09\) 302 6624](tel:093026624).

Ko wai mā ngā Kaiwhakatewhatewha?

The Ko Hon. Dame Silvia Cartwright kei te ārahi i te Whakatewhatewhatanga o Dilworth hei Heamana. Ka hono atu ki a Dame Silvia ko Frances Joychild, he rōia tuakana kua whai wāhi ki te pae rōia a te Kuīni, hei Kaiwhakatewhatewha Takirua.

Dame Silvia Cartwright

Kua eke panuku a Dame Silvia Cartwright hei mātanga rōia, kaiwawao anō hoki i ngā tau 50 nei ka taha. I 1967, i puta tōna ihu i Te Whare Wānanga o Ōtākou me te Tohu Ture, ā, ka pau ētahi tau ki ngā mahi tūmataiti i mua i tana takahi i te ara kaiwhakawā. I 1989, ka kopoua ia hei Kaiwhakawā wahine tuatahi i te Kōti ā-Rohe o Aotearoa, nāwai, ko ia hoki te Kaiwhakawā wahine tuatahi i te Kōti Teitei. Mai i 2001 ki 2006, ko ia te Kāwana Tianara 18 o Aotearoa; te wahine tuarua kua kopoua ki taua tūranga.

Mai i 2001 ki 2006, ko ia te Kāwana Tianara 18 o Aotearoa; te wahine tuarua kua kopoua ki taua tūranga.

He tokānuku a Dame Silvia i ngā Whakatewhatewhatanga hirahira o te motu. Hei tauira, nāna i ārahi te Whakatewhatewhatanga o Cartwright o 1988 mō ngā take e pā ana ki te mate pukupuku waha kōpū ki Te Whatu Ora ki Tāmaki Makaurau. Waihoki, nō nā tata nei ko ia te Heamana o te Whakatewhatewhatanga Tūmatanui o tā Toka Tū Ake whakahaere i ngā kerēme rū whenua ki Waitaha. He kaitaunaki anō hoki ia i te mana taurite, me te aha, i whai wāhi ia ki te Komiti o Te Kotahitanga o Ngā Iwi o te Ao mō Te Whakakoretanga o Ngā Whakahāweatanga Katoa ki te Wahine (CEDAW). He nui hoki te wāhi ki a ia i roto i te tuhinga hukihuki o te Tukanga Kōwhiri ki te Kaweneti CEDAW.

Frances Joychild QC

E taunga ana a Joychild ki te whakahaere arotaketanga, ketuketutanga anō hoki i te rāngai tūmataiti me te rāngai tūmatanui, me te aha, nāna i ārahi te Whakatewhatewhatanga o Te Taua-a-Rangi o Aotearoa i te tau 2015. I taua Whakatewhatewhatanga, i tiroiro ia i ngā take e hāngai ana ki te taitōkaitanga o tētahi haihana i te RNZAF i ngā tau o 1980. Nāna i arotake ngā pūnaha o taua wā hei tiaki tika, hei kaupare hoki i te toaitanga o aua āhuetanga. Nāna hoki i ārahi te arotaketanga o tā Te Hiranga Tangata whakatinana i te whakatau o Ruka a Te Kōti Pira o te tau 1997, i raro i te tohutohu a Te Minita Take Pāpori.

He nui tōna mātangatanga ki ngā take e whai pānga ana ki ngā tāngata me ngā hinonga kua pāngia e te tūkinotanga, te whakatīwheta, te whakaweti me te whakaekenga.

Kua tū a Joychild hei rōia matua i ngā take ture whīwhiwhi, tae ana ki te tū hei māngai mō te painga o ngā tūora 300 neke atu o Lake Alice i mua i tana noho ki te Kōmihana a te Karauna i te tau 2021. Kua whai wāhi atu ia ki ngā taumata katoa o te pūnaha kōti i ngā kēhi Ture Tūmatanui me ngā Tika Tāngata..

He aha ngā momo tūkinotanga e whakamātauhia ana e Whakatewhatewhatanga?

Ka arotake, ka tūhura hoki mātou i ngā pāwheratanga me ngā haupatutanga o ngā tauira o Te Kura o Dilworth. Ka uru mai ko ngā mahi pēnei i te whakatīwheta, te whakarite mātau, te whakaweti, me aua āhuetanga kia hua rā anō ko te tūkinotanga.

The Ko ngā tūkinotanga i karawhiua e tētahi o ēnei tāngata e whai ake nei::

- a. Tētahi kaimahi, mema rānei o te Poari, o Te Kura o Dilworth rānei;
- b. Ngā hoa mahi;
- c. Ngā tūao;
- d. Ngā kaiwhakarato;
- e. Tētahi tauira nō te Kura o Dilworth;
- f. Tētahi manuhiri ki te Kura o Dilworth;
- g. Tētahi atu tangata i āhei te noho atu ki ngā tauira, ahakoa te wā, nō rātou i raro i te tauwhirotanga, i ngā whakahaeretanga rānei o Te Kura o Dilworth.

Ko tēhea takiwā ka arotakehia nei e te Whakatewhatewhatanga?

Ka aro mātou ki ngā tūkinotanga i puta i te 1 o Hānuere 1950 tae noa ki te rā mutunga o te Whakatewhatewhatanga (i te wā nei ko te 16 o Tīhema 2022 tērā, māna, ka tonoa e ngā Kaiwhakatewhatewha kia roa ake te wā).

Ka hia te roa o te Whakatewhatewhatanga?

Ka tīmata ā mātou mahi i te 1 o Hūrae, ā, ka tukuna te pūrongo whakamutunga ā te 16 o Tīhema 2022, māna, me roa ake te wā. Ka whakamōhio tōmuahia ngā kaiuru o te Whakatewhatewhatanga i mua i te whakaroatanga mēnā ka mate ki te pērā.

He tauira o mua, o nāianei rānei ahau o Te Kura o Dilworth. Ka pēhea taku whai wāhi atu?

E rua ngā ara e tuku mai ai ki te Whakatewhatewhatanga tētahi tauākī muna e pā ana ki ō wheako ki Te Kura o Dilworth.

Te hui tahi ki ngā Kaiwhakatewhatewha

E āhei ana te tono kia hui tahi ki ngā Kaiwhakatewhatewha, ki a Dame Silvia Cartwright rāua ko Frances Joychild QC. Māu te wāhi e kōwhiri, pēnei i tō kāinga (i roto, i waho rānei o Tāmaki Makaurau), ki te tari rānei o te Whakatewhatewhatanga ki Tāmaki Makaurau. Mō te hunga e noho ana i waho o Tāmaki Makaurau e pīrangi ana ki te haere ki Tāmaki Makaurau ki te hui tahi ki te Whakatewhatewhatanga, ka pīkauria ngā utu hāereere, wāhi noho anō hoki mēnā e hāngai ana (tirohia a raro nei).

.

Kei te pai ki a mātou mēnā ka haere tahi mai ngā tūora ki ngā hui katoa me ētahi taituarā, tae ana ki ngā whānau, ngā mema whānau, tō rōia motuhake rānei. (Ehara i te mea me hui ā-tinana ki te Whakatewhatewhatanga hei tuku mai i ō kōrero, ka āhei hoki te tuku mai i tētahi tauākī ā-tuhi muna. Ka whakapā pea mātou ki a koe ki te matapaki i tō tauākī.)

Ka mahi tahi tātou ki te whakarite i tētahi hui e hāngai ana ki ō hiahia. Hei tauira, e taea ana te hui ā-tinana, mā ētahi pae hui ataata rānei pēnei i a HuiTopa, i a HuiTima rānei.

Mā te hui e wātea ai koe ki te kōrero mō ō wheako, tae ana ki ētahi tūkinotanga i Te Kura o Dilworth, te pānga o aua tūāhuatanga ki a koe me āu tūtohitanga hei ārai i ngā tūkinotanga o te anamata ki Te Kura o Dilworth.

I mua i tō tūtakitanga ki te Whakatewhatewhatanga, ko te painga atu kia homai tuatahi koe i tētahi tauākī ā-tuhi muna. E āhei ana te whakarite mā te puka "Te tuari i tō tauākī muna" hei ārahitanga. Māu tonu e tuhi, mā tētahi kaimahi o te Whakatewhatewhatanga rānei koe e āwhina. Mēnā kua tuhia kētia e koe tētahi tauākī ātuhi, ka mātua i tēnā, heoi anō tāu he homai.

Te Hāereere me te Wāhi Noho

Mā mātou e tuku, e pīkau hoki ngā ratonga tautoko me ngā utu hāngai o ngā Tūora hei āwhina i tō rātou whai wāhitanga ki te tukanga Whakatewhatewhatanga. Ka uru mai pea ko ngā utu hāngai mō te hāereere, te wāhi noho o te Tūora me tētahi taituarā anō hoki. Ka uru mai hoki pea ko ngā utu ki ngā kaitohuora; ā, mēnā e tika ana kia pērā, ngā utu ā-ture i hua ake nā tō whai wāhitanga ki te Whakatewhatewhatanga. Mēnā kei te hia pīkautanga utu mō te Hāereere me te Wāhi Noho, tēnā, whakakīia mai te puka Hāereere me te Wāhi Noho kei tēnei pukapuka.

E whakarite hui ai koe ki ngā Kaiwhakatewhatewha, me mātua rēhita mai koe. Anei ā mātou taipitopito whakapātanga:

Poutāpeta: Dilworth Independent Inquiry, PO Box 32-473 Devonport Auckland 0744

Imera: contact@dilworthinquiry.org.nz

Waea: E āhei ana te waea ki te Whakatewhatewhatanga mā 0800 888 743 I ngā hāora o te 9 i te ata ki te 5 i te ahiahi, i te Mane ki te Paraire

Ka whakapā atu mātou ki a koe hei whakarite i tō hui ki ngā Kaiwhakatewhatewha

Tukua mai tētahi tauākī ā-tuhi Muna

E āhei ana te tuku ki te Whakatewhatewhatanga tētahi tauākī ā-tuhi muna mō tō wheako ki Te Kura o Dilworth, tērā i te hui tahi ki ngā Kaiwhakatewhatewha. E wātea ana tētahi puka hei tikiake māu ki te tuhi i tō tauākī ki tō mātou pae tukutuku, ki www.dilworthinquiry.org.nz. Māna, ka āhei hoki te waea mai, ka tukuna atu ai te puka mā te poutāpeta rānei, mā te ĩmera rānei.

Kei te pai te pato rānei, te tuhi rānei i tō tauākī, ā, kia tukuna ki te Whakatewhatewhatanga, ki Dilworth Independent Inquiry, PO Box 32-473, Devonport Auckland 0744, mā te ĩmera rānei contact@dilworthinquiry.org.nz.

He rōia kē pea ō ētahi tūora. Heoi anō, ehara i te mea me whai rōia rawa koe e whai wāhi ai ki te Whakatewhatewhatanga.

Mēnā koe kei te hia āwhina, mā tētahi kaimahi mōhio nō te Whakatewhatewhatanga koe e āwhina ki te whakarite i tō tauākī ā-tuhi muna. E wātea ana tēnei momo tautoko ki ngā Tūora, ā, mā te Whakatewhatewhatanga tonu te utu e pīkau. E āhei ana mātou te hui atu ki a koe ki te matapaki i ō wheako me te whakarite anō i tētahi tauākī hei whakaae, hei tohu hoki māu.

Kāore e āhei ngā kaimahi o te Whakatewhatewhatanga te tuku kupu āwhina ā-ture ki ngā tūora mō ētahi o ā rātou kerēme ki Te Kura o Dilworth.

Mēnā koe kua whakarite kē i tētahi whakamahukitanga ā-tuhi mō te wā i a koe i Te Kura o Dilworth mā ngā Pirihimana, mā Te Kōmihana a te Karauna rānei, mā tētahi atu kaupapa rānei, kei te pai te tuku ki te Whakatewhatewhatanga, te whakaae rānei kia tīkina atu e te Whakatewhatewhatanga tētahi kape.

Kei te pai noa iho te tuku muna mai i tō tauākī, heoi anō, ka āwhina te whakaurunga o tō ingoa me ō taipitopito whakapā i a mātou ki te whakapā atu ki a koe kia mōhio ai mēnā ka pīrangi whai wāhi koe ki ngā Taupua Oranga ka tukuna e te Whakatewhatewhatanga. Ka āwhina hoki mēnā ka hiahia mātou i ētahi kōrero atu anō.

Mō ētahi anō whakamārama e pā ana ki te tuku mai i tō tauākī ā-tuhi muna, tēnā haere ki tō mātou pae tukutuku: www.dilworthinquiry.org.nz

He aha ngā momo tautoko e wātea mai ana e whai wāhi ai ahau ki te Whakatewhatewhatanga?

E ū ana mātou ki te āwhina i ngā tūora kia whai tautoko tika i a rātou e mahi tahi ana ki a mātou..

Taupua Oranga

E ū ana te Whakatewhatewhatanga kia pupuri i te oranga o te hunga ka kōwhiri ki te whai wāhi mai ki te hātepe. Katoa te hunga ka whai wāhi ki te Whakatewhatewhatanga ka āhei te toro atu ki te Rūnanga Oranga me tana tīma mātanga e taunga ana ki te mahi tahi ki ngā tūora tūkinotanga me ngā ngaukinotangatanga.

Mā ngā Kāpehu Oranga e āwhina te hunga e rēhita ana ki te whai wāhi ki te Whakatewhatewhatanga, e tautoko, ā, e whakawhiti anō hoki ki ngā ratonga tūora me ētahi atu ratonga tautoko. Kei te whakamahi te Rūnanga i tētahi anga whakahaere e ai ki te manaakitanga. Nā reira ka tūhono ngā Kāpehu i ngā tūora, ngā whānau me ngā kaiuru katoa ki ngā momo tautoko, i te wā tonu o te tuku haere i ngā kōrero i waenganui i te Whakatewhatewhatewhatanga, ngā tūora, me ētahi atu momo tautoko ka hiahiatia. Ka kakari ngā Kāpehu Oranga ki te whakatairanga i ngā mātāpono o te tiaki e ai ki te ngaukinotangatanga i raro i ngā tikanga Māori o aroha, o manaakitanga, o whanaungatanga me kaitiakitanga. Ahakoa ngā ao o ngā kaiuru, ka mahi tahi te Rūnanga Oranga ki a rātou ko ō rātou whānau, ko ngā taituarā hei whakaū i te whakatinanatanga o ngā wawata.

Hei whakapā atu ki te tīma Oranga, tēnā īmerahia te Whakatewhatewhatanga mā contact@dilworthinquiry.org.nz, me waea rānei mā 0800 888 743 i ngā hāora o te 9 i te ata ki te 5 i te ahiahi, i te Mane ki te Paraire.

He āwhina ki te whakarite i ngā tauākī ā-tuhi muna

He rōia kē pea ō ētahi tūora. Heoi anō, ehara i te mea me whai rōia rawa koe e whai wāhi ai ki te Whakatewhatewhatanga.

Mēnā koe kei te hia āwhina, mā tētahi kaimahi mōhio nō te Whakatewhatewhatanga koe e āwhina ki te whakarite i tō tauākī ā-tuhi muna. E wātea ana tēnei momo tautoko ki ngā Tūora, ā, mā te Whakatewhatewhatanga tonu te utu e pīkau. E āhei ana mātou te hui atu ki a koe ki te matapaki i ō wheako me te whakarite anō i tētahi tauākī hei whakaae, hei tohu hoki māu.

Kāore e āhei ngā kaimahi o te Whakatewhatewhatanga te tuku kupu āwhina ā-ture ki ngā tūora e pā ana ki ētahi o ā rātou kerēme mō Te Kura o Dilworth.

Ka pēhea tā te Whakatewhatewhatanga whakahaere i ngā kōrero whaiaro ka hoatu e au?

Me kohi te Whakatewhatewhatanga i ngā kōrero whaiaro whakaraerae e pā ana ki ngā tūkinotanga ki Te Kura o Dilworth. E ū ana mātou ki te whakahaere i ēnei kōrero e ai ki ngā mātāpono o whakaraerae, o muna, me matatapu, ā, ka kohia, ka whakamahia anake ngā kōrero whaiaro hei tautoko mārakerake i ngā whāinga o te Whakatewhatewhatanga. Kitea ai ētahi whakamārama atu anō mō tā te Whakatewhatewhatanga whakahaere, tiaki anō hoki i ngā kōrero whaiaro ki tō mātou tauākī matatapu.

Mēnā ehara ahau i te tauira o mua, o nāianei rānei o Te Kura o Dilworth, ka pēhea taku whai wāhi ki te Whakatewhatewhatanga?

Kei te hia kōrero te Whakatewhatewhatanga ki te hunga e whakaponu ana he kōrero ā rātou, he taunakitanga rānei e hāngai ana ki Ngā Tikanga Whakahaere o te Whakatewhatewhatanga. He whānau pea, he hoa rānei nō ngā tauira, ngā kaiako rānei o mua, o nāianei rānei o Te Kura o Dilworth.

Kitea ai Ngā Tikanga Whakahaere ki tō mātou pae tukutuku. www.dilworthinquiry.org.nz

Mēnā koe kei te pīrangī whai wāhi ki te Whakatewhatewhatanga, tēnā, whakapā mai ki te Whakatewhatewhatanga mā contact@dilworthinquiry.org.nz. Me waea rānei mā 0800 888 743 i ngā hāora o te 9 i te ata ki te 5 i te ahiahi, i te Mane ki te Paraire.

He aha ngā tūāoma o te Whakatewhatewhatanga Motuhake?

Ka uru mai ki ō mātou tūāoma ko ēnei: te whakarongo ki te hunga pīrangī kōrero ki a mātou; te whakapā atu ki te hunga he korero hāngai ō rātou, ā, te kimi me te arotake i ngā puka pēnei i ngā kōnae ā-kura me ngā kōpaki a ngā Pirihimana

Ko ā mātou hātepe ka whai kia:

- a. tautoko i ngā Tūora, ngā whānau, ngā hoa rānei o ngā Tauira o mua, o nāiane rānei o Te Kura o Dilworth, e pīrangi ana ki te whai wāhi ki ngā mahi a te Whakatewhatewhatanga;
- b. whakarite i ngā ara maha e tuari ai ngā Tūora i ō rātou wheako ki te Whakatewhatewhatanga (hei tauira, mā ngā tauākī i tukua i horopaki kē atu);
- c. kore e tōai i te ngaukinotangatanga ki ngā Tūora, ngā whānau, ngā hoa rānei o ngā Tauira o mua, o nāiane rānei o Te Kura o Dilworth, mēnā e taea ana te pērā;
- d. mōhio ki ngā tirohanga ā-ahurea hāngai;
- e. he mārama;
- f. kore e kōaro i ngā hātepe ā-taihara, ākirirarau rānei o inamata, ā, o te anamata rānei, i ētahi atu whakatewhatewhatanga rānei e tū ana i te wā kotahi;
- g. āta tiaki i ngā kōrero whaiaro ka tae atu ki a ia e ai ki ngā mātāpono o mākohe, o muna, o matatapu me te whakaaetanga mātau, ā, me hāngai hoki ki ngā ture pēhi mēnā e pērā ana;
- h. whakaae kia tonoa e te hunga i tuku korero ā-tuhi ki te Whakatewhatewhatanga ō rātou kōrero ā te anamata;
- i. whakamōhio i te hunga whai wāhi mō ngā tautoko, ngā amuamu me ētahi atu hātepe ka wātea pea ki a rātou;
- j. tika te whakahaere i ngā inakitanga i waenganui i te Whakatewhatewhatanga me te Hōtaka Pūretumu e iti ai te kohukitanga me te ngaukinotanga ki ngā Tūora ka whai wāhi ki ngā hātepe e rua.

Me he whakaaro ōu, he tūtohitanga rānei e pā ana ki ā mātou hātepe, tēnā, whakapā mai mā contact@dilworthinquiry.org.nz, waea mai rānei ki te Whakatewhatewhatanga mā 0800 888 743 i ngā hāora o te 9 i te ata ki te 5 i te ahiahi, i te Mane ki te Paraire.

E mea ana Ngā Tikanga Whakahaere me whai whakaaro ki ngā tirohanga ā-ahurea, he aha te tikanga o tērā kōrero?

Ko te tikanga kia tōia mai, kia whakautehia anō hoki ngā horopaki ā-ahurea rerekē o te hunga e whai wāhi ana ki te Whakatewhatewhatanga. Mā reira e mārama ake ai ngā horopaki o ia kaiuru me ō rātou whānau, kāinga, 'aiga rānei. Ko te whakatīnangatanga ko te kia mahi tahi ki ngā kaiuru o te Whakatewhatewhatanga i runga tonu i te ārahitanga o ngā hiahia ā-ahurea o ngā kaiuru.

Kei te pīrangi rongo te Whakatewhatewhatanga i ngā Māori I kuraina, e kuraina tonu ana rānei ki Dilworth, me te aha, he kōrero hāngai ō rātou ki te Whakatewhatewhatanga?

Kei te pīrangi rongo te Whakatewhatewhatanga i ngā Māori I kuraina, e kuraina tonu ana rānei ki Dilworth, me te aha, he kōrero hāngai ō rātou ki te Whakatewhatewhatanga. Nā runga i te aronga tuāpapa o Te Kura o Dilworth me te hirahiratanga o te Māori hei tangata whenua, he nui te wāhi ki ngā tirohanga Māori i roto i ā mātou tikanga whakahaere.

He mema au o te hapori LGBTQI, he hirahira rānei ōku whakaaro ki te Whakatewhatewhatanga?

Āe, he hirahira ngā whakaaro o ngā Tūora Tama o Mua, o ngā tauira o Dilworth (o mua, o nāianei anō hoki) me ō rātou whānau nō te hapori LGBTQI. Kei te hia rongo mātou i ngā whakaaro whānui katoa e mārama pū ai mātou ki ngā wheako whānui me ngā panga ki te tangata, ki ō rātou whānau anō hoki.

He aha te rerekētanga o te Whakatewhatewhatanga Motuhake o Dilworth i Te Kōmihana a Te Karauna?

He tukanga rerekē ēnei. He whānui tonu te mana karawhiu a Te Kōmihana a Te Karauna, e ai ki ōna tikanga whakahaere nā te Kāwanatanga, ā, he mauroa āna mahi. Kāore ōna arotahitanga ki Te Kura o Dilworth, ā, kei te tiro kē ia ki ngā mahi i mahia rā ki ngā tamariki, ngā rangatahi me ngā pakeke whakaraerae i te taurimatanga a te Karauna me ngā whare whakapono i Aotearoa i waenganui i te 1950-1999. Kitea ai ētahi anō whakamāramatanga mō Te Kōmihana a te Karauna ki tana pae tukutuku www.abuseincare.org.nz

Ka arowhāiti Te Whakatewhatewhatanga Motuhake o Dilworth ki Te Kura o Dilworth, ā, he mea whakatū nā Te Poari Kaitiaki o Dilworth. Kua waihangahia hei arotake anake i ngā take e hāngai ana ki Te Kura o Dilworth, ka mutu, e noho motuhake katoa ana i Te Kōmihana a te Karauna, me Te Kura o Dilworth. Ka arotake te Whakatewhatewhatanga i te āhua me te rangiwhāwhātanga o ngā pāwheratanga me ngā haupatutanga o ngā tauira o Te Kura o Dilworth mai i te tau 1950 ki te rā mutunga o te Whakatewhatewhatanga.

Ka mate ngā Tumuaki, ngā kaimahi mātāmua o Dilworth me ngā mema o te Poari Kaitiaki o Dilworth ki te whai wāhi ki te Whakatewhatewhatanga?

Kāore ō mātou mana ki te tohu i te tangata kia whai wāhi mai ai rātou, kia homai taunakitanga rānei ki te Whakatewhatewhatanga..

Heoi anō, kua oati mai Te Poari Kaitiaki o Dilworth ka ngākau tuwhera mai ia ki te Whakatewhatewhatanga, tae ana ki te āwhina i a ia ki te whakarongo ki ngā kōrero a te hunga i mahi, e mahi tonu ana rānei, e whai hononga ana rānei ki te Poari me te Kura.

Ka uru mai ko te oati o ngā mema o nāianei o te Poari Kaitiaki kia whakawātea mai rātou i a rātou anō mō ngā uiuitanga ki te Whakatewhatewhatanga mēnā ka tonoa, waihoki, te āwhina

i te Whakatewhatewhatanga ki te whakapā atu ki ngā mema Poari o mua me ngā kaimahi anō hoki, mēnā ka tonoa.

Ki hea whakaputaina ai ngā tūhuratanga o te pūrongo whakamutunga a te Whakatewhatewhatanga Motuhake o Dilworth?

Ka hoatu tētahi pūrongo ā-tuhi me ngā tūhuratanga, tūtohitanga anō hoki e pā ana ki ngā take kei te kōrahi o Ngā Tikanga Whakahaere ki Te Poari Kaitiaki o Dilworth. Ka whakaputa tūmatanuitia tēnei pūrongo, hāunga pea ētahi tāpōuritanga hei pupuri i te munatanga o te hunga i whai wāhi ki te Whakatewhatewhatanga. Ka wātea hoki tētahi kape ki te katoa i whai wāhi mai ki te Whakatewhatewhatanga.

Ka whakauru rānei Te Kura o Dilworth i ngā tūtohitanga ka whakarārangi i te pūrongo a te Whakatewhatewhatanga?

Kāore ō te Whakatewhatewhatanga mana ki te tohu atu i te whakaurunga o āna tūtohitanga. Ka whakaputaina tūmatanuihia te Pūrongo o te Whakatewhatewhatanga Motuhake o Dilworth, tae ana ki ngā tūtohitanga. Kua kī nei te Poari Kaitiaki o Dilworth e oati ana ia ki te kapo i ngā akoranga mai i ngā tūhuratanga me ngā tūtohitanga a te Whakatewhatewhatanga hei whakaū ake i te manaakitanga, te haumarutanga me te tiakitanga o ōna tauira o nāianei, ā, o āpōpō anō hoki. Mā te Poari Kaitiaki o Dilworth tonu e whakatau mēnā rānei ka whakauruhia ngā tūtohitanga a te Whakatewhatewhatanga.

Ka utu parematahia, puretumuhia rānei ahau e te Whakatewhatewhatanga?

Kāore e taea e mātou te tuku utu paremata, puretumu rānei. Heoi anō, kua whakaritehia e Te Kura o Dilworth tētahi Hōtaka Puretumu Motuhake.

Ka wātea te Hōtaka Puretumu, tērā e uru ai ngā kōwhiringa whānui me ngā puretumu āpūtea, ki ngā tūora Tama o Mua i pāngia e te pāwheratanga me ngā haupatutanga nā tētahi māngai o Dilworth nōna e tauira ana ki Te Kura o Dilworth.

Ka noho muna te Hōtaka Puretumu. Kāore he utu mā ngā tūora, he māma hoki te toro atu.

Mō ētahi whakamārama atu anō e pā ana ki te Hōtaka Puretumu, haere ki www.dilworthresponse.org.nz/redress-programme.